

01 NOIEMBRIE
RUGĂCIUNEA
SF. DOCTORI FĂRĂ DE ARGINȚI
COSMA ȘI DAMIAN
Молитва

О чудотворцы сла́внии, вра́чеве безме́зднии, Космо́ и Дамиа́не! Вы́ от ю́ности Христа́ Бо́га возлюбивше и Того́ повелѣния всѣм се́рдцем соблюда́юще, а́ще и вда́сте себѣ учѣнию враче́бному, но добродѣтельнаго ра́ди жити́я и чистоты́ душе́вныя, си́лою Христа́ Бо́га, не врачева́ния то́кмо иску́ство, но па́че неоску́дную благода́ть исцелѣния всяких неисцѣльных неду́гов от Бо́га прия́ли есте́. Отону́дуже любви́ю и милосе́рдием к неду́гующим подвиза́еми, не то́кмо лю́дем, но и ското́м исцелѣния болѣзней подава́ете, неисче́тным мно́жеством чудѣс ва́ших ве́сь ми́р наполня́ете, и не теле́сныя то́кмо неду́ги исцеля́ете, но и ве́рою Христо́вою ду́ши просвеща́ете, в терпе́нии болѣзней укрепля́ете, в тяжких неду́зех о исправлѣнии жити́я вразумля́ете и ко Христу́ пока́нием привлека́ете. Те́мже

ны́не и на́с, припа́дающих к ва́м пред
честно́ю ико́ною ва́шею, ско́ро услы́шите.

Ю́ныя де́ти, ва́шей по́моци во уче́нии
кни́жном прося́щия, ва́шими моли́твами
наста́вите, да ва́шему жити́ю ревну́юще, не
земно́е то́чию науче́ние приобря́щут, но
па́че во благо́честии и пра́вой ве́ре
непреста́нно да преспева́ют. На одре́
боле́зни лежа́щим, челове́ческая по́моци
отча́янным, к ва́м же те́пле с ве́рою и
усе́рдною моли́твою прибега́ющим,
исцеле́ние боле́зней ва́шим ми́лостивым,
чудоде́йственным посе́щением да́руйте.
Мно́гажды в боле́зни впа́дающия и от
лю́тых недуг в уны́ние, малоду́шие и
ропта́ние прише́дшия, да́нною ва́м от Бо́га
благода́тию в терпе́нии утверди́те, и
наста́вите, да уразуме́ют волю́ о них Бо́жию
святу́ю и соверше́нную, и са́ми себе́ и
живо́т сво́й во́ле Христа́ Бо́га преда́ют. В
неду́зех су́щих, о исправле́нии же жити́я
нерадя́щих, в гресе́х не раскаи́вающихся,
се́рдцем ожесточе́нных, сокруши́те во
спасе́ние и к пока́нию призови́те, да
немо́щны су́ще те́лом, здра́вы пребу́дут

душею, и причастицы соделаются Божия спасительныя благодати. Братию святаго храма сего, вашему святому заступлению от Бога врученную, и всех к вам усердно прибегающих невредимы сохраните от долгонедужия, от болезней лютых и неисцельных, от расслабления тела, от исступления ума, от смертоносныя язвы, от внезапныя смерти, и мощным ходатайством вашим к Богу соблюдайте в правой вере твердых, во благочестии преспеющих, в добрых делах усердных, в молитве к Богу прилежных, да с вами вкупе сподобятся в будущем веце присно воспевати и славити всесвятое и великолепое имя Отца и Сына и Святаго Духа во веки веков. Аминь.

